

方等部

金光明最勝王經疏

卷二十四
之二十六

金光明最勝王經疏卷第二十四

唐三藏法師義淨譯

唐白馬寺翻經沙門慧沼疏

長者子流水品第二十五

長者子流水品二十五三門分別言來意者。十千得記。天女疑生前授記品。末雖爲略。陳未能明解。故除病流水二品。更爲廣辨。令眾深知。前品廣其緣起。此品正說記因。故有此品。故下云。因我往昔以水濟魚與食。令飽爲說。甚深十二緣起。并此相應。陀羅尼呪。又爲稱彼寶髻佛名。因此善根得生。

天上今來我所歡喜聽法我皆當與授菩提記。釋名者云。長者子標父以明子表種姓尊。流水者以行彰名明其行勝。又自亦是長者爲簡其父。復稱爲子。以有養人長魚之德。故號長者。流水二義。一能流水。二能與水從行爲名。此乃德行雙彰。此品廣明其事故。以爲名。解妨者問。何故不名救魚品。答。流水義廣。因爲救魚亦沾餘類。故不獨名救魚品。

爾時佛告菩提樹神善女天。爾時長者子流水於往昔時在天自在光王國內療諸眾生所有病苦。令得

平復受安隱樂時諸眾生以病除故多修福業廣行
惠施以自歡娛卽共往詣長者子所咸生尊敬作如
是言善哉善哉大長者子善能滋長福德之事增益
我等安隱壽命仁今實是大力醫王慈悲菩薩妙閑
醫藥善療眾生無量病苦如是稱歎周徧城邑。

品文分四。一歎結醫能二善女天下明救魚行三
爾時佛告下結會今古四爾時大眾下領悟依學。
初中復四。初結眾病除次時諸眾生下明眾增福
業次卽共往詣下眾往禮讚次如是稱歎下總結
名聞。

善女天時長者子妻名水肩藏有其二子一名水滿
二名水藏。

明救魚行文亦爲四。初明菩薩眷屬。二是時流水
下明其救魚三。爾時世尊下諸天聞讚四佛告善
女。天下明魚報恩。此卽初也。

是時流水將其二子漸次遊行城邑聚落過空澤中
深險之處。見諸禽獸豺狼狐獾鵬鷺之屬食血肉者
皆悉奔飛一向而去。時長者子作如是念。此諸禽獸
何因緣故一向飛起。我當隨後暫往觀之。卽便隨去。
見有大池名曰野生。其水將盡於此池中多有眾魚。

流水見已生大悲心。時有樹神示現半身作如是語。
善哉善哉善男子。汝有實義名流水者。可愍此魚。應
與其水。有二因緣。名爲流水。一能流水。二能與水。汝
今應當隨名而作。是時流水問樹神言。此魚頭數爲
有幾何。樹神答曰。數滿十千。善女天。時長者子聞是
數。已倍益悲心。時此大池爲日所暴。餘水無幾。是十
千魚將入死門。旋身宛轉。見是長者。以有所希。隨逐
瞻視。曰。未曾捨時。長者子見是事。已馳趣四方。欲覓
於水。竟不能得。復望一邊。見有大樹。即便昇上。折取
枝葉。爲作蔭涼。復更推求。是池中水。從何處來。尋覓

不已見一大河名曰水生時此河邊有諸漁人爲取
魚故於河上流懸險之處決棄其水不令下過於所
決處卒難修補便作是念此崖深峻設百千人時經
三月亦未能斷況我一人而堪濟辦時長者子速還
本城至大王所頭面禮足卻住一面合掌恭敬作如
是言我爲大王國土人民治種種病悉令安隱漸次
遊行至其空澤見有一池名曰野生其水欲涸有十
千魚爲日所暴將死不久唯願大王慈悲愍念與二
十大象暫往負水濟彼魚命如我與諸病人壽命爾
時大王卽敕大臣速疾與此醫王大象時彼大臣奉

王敕已。曰。長者子善哉。大士仁。今自可至象廐中。隨
意選取二十大象。利益眾生。令得安樂。是時流水及
其二子。將二十大象。又從酒家多借皮囊。往決水處。
以囊盛水。象負至池。瀉置池中。水卽彌滿。還復如故。
明其救魚有八。一父子遊方。二見諸禽獸。下明覩
異相。三時長者子下菩薩思念。四卽便隨去。下念
已尋觀。五見有大池。下遂見枯魚。六流水見已下。
卽起悲心。七時有樹神。下樹神勸救於中。有三。一
現身爲急難故。二作如是語。下讚歎引冀發心故。
三善男子。汝有實義。下勸救符名義故。於中復三。

初標勸次有二因緣下釋勸汝今應當下結勸八
是時流水下依請爲救於中復六。一問數幾許。二
樹神答曰下答有十千。三善女天下轉益慈悲。四
時此大池下明魚受苦。五見是長者下眾魚希救。
六時長者子下慈悲正救於中復二。初悲心救苦
後復更思惟下慈心與樂。故經云演說正法樂能
爲後世受樂因故。初救苦有二。初與水後善女天
時長者下施食與水有十一。此初徧求無水。二復
望一邊下且爲作涼。三復更推求下尋覓池源。四
時此河邊下見源被決。五便作是念下念難修補。

六時長者子下求象於王。七爾時大王下王敕急與八時彼大臣下掌官任選。九是時流水下得象遂意。十又從酒家下假借酒囊。十一往決水處下運水添池還復得滿。

善女天。時長者子於池四邊周旋而視。時彼眾魚亦復隨逐循岸而行。時長者子復作是念。眾魚何故隨我而行。必爲饑火之所惱逼。復欲從我求索於食。我今當與。爾時長者子流水告其子言。汝取一象最大力者。速至家中。啟父長者家中所有可食之物。乃至父母食啗之分。及以妻子奴婢之分。悉皆收取。即可。

持來。爾時二子受父教已。乘最大象。速往家中。至祖父所說如上事。收取家中可食之物。置於象上。疾還父所。至彼池邊。是時流水見其子來。身心喜躍。遂取飯食。徧散池中。魚得食已。悉皆飽足。

悲心救苦中第二。施食有十二。初長者巡瞻。二時彼眾魚下。魚亦隨視。三時長者子下。長者觀念。四必爲飢火下。知魚所惱。五我今當與者。慈心念與。六爾時長者子下。令子取食。七爾時二子下。子詣祖陳。八收取家中下得食而返。九是時流水下。長者心歡。十遂取餅食下。卽徧施魚。十一魚得食已。

下魚因飽足。

便作是念我今施食令魚得命願於來世當施法食充濟無邊。

第十二長者發願。

復更思惟我先曾於空閒林處見一苾芻讀大乘經說十二緣生甚深法要。又經中說若有眾生臨命終時得聞寶髻如來名者卽生天上我今當爲是十千魚演說甚深十二緣起亦當稱說寶髻佛名。然瞻部洲有二種人。一者深信大乘二者不信毀訾亦當爲彼增長信心。

慈悲正救中第二慈心與樂有一初內自思惟後
時長者子下外行利樂初中復三初念昔所聞次
我今下思爲魚說後然瞻部下兼亦利人卽下文
中由魚得益報長者恩王臣等聞因發深信故也
三文如次。

時長者子作如是念我入池中可爲眾魚說深妙法。
作是念已卽便入水唱言南謨過去寶髻如來應正
徧知明行足善逝世閒解無上士調御丈夫天人師
佛世尊。此佛往昔修菩薩行時作是誓願於十方界
所有眾生臨命終時聞我名者命終之後得生三十

三天

外行利樂有二。初思欲入池。作是念下正爲饒益。中復有二。初爲稱佛名。爾時流水下爲說深法。亦卽未信。令信已信。令解。初中初稱佛名。此佛往昔下釋爲稱此佛之所以。

爾時流水復爲池魚演說如是甚深妙法。

下爲說法有二。初顯說後密說。或初說法令解後說呪爲護。初中復二。初總標次別釋。此標也。

此有故彼有此。生故彼生。

下有二釋。初明雜染緣起卽是依流轉生死次第。

後此滅故彼滅下明清淨緣起卽是依還滅斷除
次第然一二類緣起各有順逆二種觀行此各依順
說影彰二逆觀初中復二初別標所謂下別釋此
初也準雜集論第四說有三緣生一無作緣生二
無常緣生三勢用緣生初二緣生通一切有爲第
三緣生約有情法然諸處文多約十二緣起支辨
是根本故言此有故彼有等者如次初二對法云
此有故彼有者明無作緣生義唯由有緣故果法
得有非緣有實作用能生果法此爲破諸外道橫
執大梵神我有實作用能爲物因故云非緣有實

作用能生果法亦破外道無因妄計故云此有故
彼有此生故彼生者明無常緣生義非無生法爲
因故少所生法而得成立此破外道常法爲因能
生諸法亦遮未來化地部等執有十二緣起支無
爲能令緣起生無雜亂故云亦非無生法爲因故
少所生法而得成立言甚深者有五種云因甚深
故相甚深故生甚深故住甚深故轉甚深故是甚
深義廣如彼釋。

所謂無明緣行行緣識識緣名色名色緣六處六處
緣觸觸緣受受緣愛愛緣取取緣有有緣生生緣老

死憂悲苦惱。此滅故。彼滅。所謂無明滅。則行滅。行滅。則識滅。識滅。則名色滅。名色滅。則六處滅。六處滅。則觸滅。觸滅。則受滅。受滅。則愛滅。愛滅。則取滅。取滅。則有滅。有滅。則生滅。生滅。則老死滅。老死滅。則憂悲苦惱滅。如是純極苦蘊悉皆除滅。

別釋緣起。此卽第三勢用緣生也。諸有爲法。因緣別故。各有勢用。故對法云。雖復諸法無作無常。然不隨一法爲緣。故一切果生。諸法功能各差別故。十地經云。死別離時。意根相對名憂。五根相對爲苦。出聲啼哭名悲。愚人心熱名惱。此依雜染生起。